



Komunikadu Imprensa  
21 Agostu 2024

## **JSMP Fasilita Formasaun kona-ba Lideransa Transformativa ba Kuadru Partidu Polítiku sira iha RAEOA – Oekusi**

Iha 15 Agostu 2024, JSMP, liuhosi Gabinete Apoiu Servisu Sosiedade Sivíl (GASC) ne'ebé tutela iha Gabinete Segundu-Vise Primeiru-Ministru, realiza formasaun dahuluk kona-ba lideransa transformativu ba kuadru partidu polítiku sira ne'ebé hetan asentu parlamentár hanesan; CNRT, Fretelin, PD, PLP no KHUNTO iha Salaun Alfela Palaban.

Formasaun ne'e ho objetivu atu eleva no reforsa koñesimentu kuadru lideransa no estrutura partidu polítiku sira iha RAEOA kona-ba lideransa transformativu, atu-nune'e bainhira iha oportunidade ba asume knaar ka funsaun iha setór públiku ka sai hanesan membru deputadu ka membru Governu, bele ezerse knaar sira ne'e ho kualidade, ho merítu no profesionál no responsável.

“Eventu ka formasaun ho natureza hanesan ne'e importante, tanba matéria formasaun ne'e énfaze ba kualidade lideransa ne'ebé inspira hosi esperiênsia no ezemplu ka referênsia prátika di'ak sira nasaun seluk ne'ebé ita buka atu refléta ba ita nia kontestu, integra aspeitu no kualidade lideransa ne'ebé iha valór sira hanesan integridade, onestidade, responsabilidade no anti-korrupsaun atu líder hotu tenke komprende no obedese”, dehan Sr. Casimiro dos Santos, Diretor Ezekutivu Interino JSMP.

JSMP apresia no agradese ba Governu Konstitusionál IX liuhosi Gabinete Apoiu Servisu Sosiedade Sivíl (GASC) ne'ebé tutela iha Gabinete Segundu-Vise Primeiru-Ministru liuhosi apoiu finanseiru atu fasilita formasaun ne'e ba kuadru partidu polítiku sira ne'ebé iha asentu iha PN.

Iha sesaun abertura Distintu Deputadu Firmino Taequi ne'ebé nu'udar mós Koordenadór Partidu CNRT Oekusi, espresa katak formasaun kona-ba lideransa transformativu ne'e importante teb-tebes ba líder no estrutura partidu sira iha RAEOA hodi bele iha koñeseimentu natoon kona-ba asuntu sira ne'e. Sr. Taequi haktuir tan katak nu'udar Oekusi oan ne'ebé tu'ur iha Parlamentu Nasionál lembra katak tema no alvu hanesan ne'e foin primeiravés organiza no partilla ba kuadru no estrutura partidu polítiku sira iha RAEOA. Tanba dalabrak nu'udar partidu ita ko'alia poliítika de'it, maibé bainhira ita tama ona iha sistema estadu nian buat hotu tenke la'o tuir lei no regra estadu ninian.

Matéria ne'ebé kobre durante sesaun sira mak konsentra ba asuntu sira relasiona ho konseitu lideransa transformativu ne'ebé hahú elabora ho saida mak lideransa, lideransa tuir péritu sira ninia hanoin/hanorin, diferença entre líder, jestór, xefe no patraun ka boss, tipu lideransa, kualidade lideransa ne'ebé intregra valór sira kona-ba integridade, onestidade, responsabilidade

(akontabilidade), anti-korrupsaun nu'udar elementu xave iha konseitu lideransa iha era atuál. Matéria sira ne'e hotu elabora iha manuál ne'ebé distribui ba partisipante sira no finánsia husi fundu GASC atraves hosi projeitu ne'e.

Kestaun sentráal ne'ebé énfaze no aborda iha formasaun ne'e mak konsentra ba papél lideransa ne'ebé iha kbi'it ka kapasidade atu inspira, orienta, organiza no mobiliza individu ka grupu atu luta ba interesse komún. Líder idéntiku ho asaun (serbisu) no responsabilidade; la'ós oportunidade ba pozisaun ka kargu.

Durante sesaun sira husi dader to'o loro-kraik, partisipante sira alende rona esplikaun, sira mós halo ezersísiu atu buka kompriende konseitu hirak ne'e, halo pergunta no reflesaun krítiku no tenta atu ezamina konseitu hirak ne'e ho ita nia realidade atuál.

Sesaun ne'ebé provaka diskusaun no diálogu nakloke entre partisipante sira bainhira diskute no esplora kona-ba lideransa transformativu ho qualidade ka valór sira relaciona ho integridade, onestidade, akuntabilidade. Liuliu elabora klean kona-ba karakterístika qualidade lideransa ne'ebé énfaze ba aspetu (líder) ne'ebé konsistente; entre liafuan no hahalok, líder ne'ebé la kompmete ninia dignidade ba benefísiu pesoál ka família, grupu ka feto, osan no pozisaun, líder ne'ebé la simu subornu no korrupsaun, kaer-metin morál no etiku ne'ebé orienta ninia ukun.

Partisipante sira mós ezamina qualidade hirak ne'e hodi kompara ho ita nia realidade, no sira konklui katak maioria qualidade hirak ne'e auzente no falta hosi ita-nia líder sira. Partisipante sira relembra katak maioria ita nia líder sira ninia promesa ho realidade la konsistente, la sente moe ka sente an bainhira halo sala. Sira mós preokupa ho nomesaun polítika nu'udar dezafiu boot atu hetan qualidade hirak ne'e, no politika "*bongkar-pasang*" nu'udar ameasa sériu ba qualidade iha ita ninia administrasaun públiku atuál.

Tanba ne'e sira rekomenda katak formasaun hirak ne'e tenke abranje ba lideransa iha kuadru superiór sira ka mínimu partidu polítiku sira tenke iha espasu atu iha sesaun partilla kona-ba qualidade hirak ne'e ba sira ne'ebé hetan konfiansa atu asume kargu ka pozisaun iha setór relevante sira estadu nian.

Atividade ne'e, participa husi kuadru partidu politiku lima iha PN ho totál na'in 18 ne'ebé kompostu hosi mane 14 no feto hamutuk ema na'in 4 hosi planu inisiál ne'ebé loloos na'in 20.

Atu hetan informasaun kompletu favor kontaktu:

Casimiro dos Santos

Diretor Ezekutivu Interinu JSMP

Diresaun e-mail: [casimiro@jsmp.tl](mailto:casimiro@jsmp.tl)

Telefone: (+670) 33238883 | 77257466

Website: <https://jsmp.tl>

[info@jsmp.tl](mailto:info@jsmp.tl)

[@pengikut@sorotan](https://t.me/pengikut@sorotan)

